

SCHEINER
DE WAUND



mozad

des is ka grinsn
des is mei oat fon hoss
kum bite ned neea
bleib bitte en meeachen
und scheng ma dein schuach
und ii bleib do sizn
des is do kaa hoofm
fiar a augschwamte liibe
des is üwahaubd nigs
des is a waunsiin

i hoss den mozad
i bin fuachboa noo draun
a bombm zum kaufm
und noch soezbuag zum fooan
i hoss den mozad
i bin fuachboa noo draun
a en bach zum faoochtn
und zum deife zum fooan

wia ea mia am oasch geed
und wii du mia föösd
kum bite ned neea
des is doo ka raumschif
i bin fuachboa noo draun
nooch soezbuag zum reena
des is a waunsiin
des is doo kaa wunschkonzeat
fia an schdaaoedn frusd
und e maan goa need dii
des is a waunsiin

i hoss den mozad
i bin fuachboa noo draun
des is mei oat zum grinsn
des is üwahaubd nigs
i hoss den mozad
i bin fuachboa noo draun
des is mei oat zum grinsn
des is mei oat fon hoss

daun

daun daun daun daun
daun daun daun weer i wos moochn
und daun daun daun daun
daun daun daun es weaz no schau
brauchz goa ned bled loochn

wäu daun waun ii oes sauwa beinaunda hoob
daun niim ii ma ualaub fon eich
und farfliis mei heisl neich
und es hoobz kaa aunung waso
und es siizds a leem laung
auf an gloo woss schon keends

brauchz goa ned bleed schau
brauchz goa ned so deppad schau
es soez ned so deppad schau
wäu daun daun daun daun
daun daun daun
owa daun
wäu ii kaun

i gee ned miid

i schof de schdodd ob und de autobau
i siz im baam und schau de kiaschn au

i gee ned mid heasd wauns me hoen
soog de aundan ea is bleed

i schof de aungsd ob und es schloofngee
i siz en baam und siich de baama schdee

i gee ned mid heasd wauns me hoen
soog de aundan ea is bleed

kaana ruafd me zum eessn
kaana groobd in mia um

i schof de schdood oo und de autobau
i siz im baam und schau de kiaschn au

de waund

i moe kaane heazn meea aun deine waund
i hau dein off ens groob
und moos hod an freindlechn hunga
ich libe di liibe nicht meea
und des is seea weise

wohin kumsd du waun du kuumsd
und wos soe dei dakklbliig
woher kumsd du waun i kuum
und woos faschdegd doo dei haund

i moe jeez kaana heazn meea
aun deine waund
wäu in den groob deine hand und dein blik
imma schlechda faschdeegd
unta offm und moos

fia de feegl

waunst me auschaust hosd me gean
waunst me gean hosd kemma schdeam
wauma schdeam bleim d feegl deppad siizn
fia de feegl fia de feegl schloof i jez mid diia

waunst me auschaust kaun e rean
waun e rean kau kaun i schdeam
waun e schdiiab fliiang d feegl fuat mit diia
kum schloof mid miia

nowemba

waun i wos hob daun kaa geduid
waun i wo bleib daun in de schuach
i ren fon diia und miia zum billa
a biia fian weeg an goowebissn

aun so an diinsdoog aunfaung juni
ziiag i mei uua ned auf schoo iss nowemba
i ziaag mein schliidn iwa d wiisn
a fest fia jeedn dea olas kend

i schdee wia hiigschlazd auf da gossn
i schau da nooch und rauch an dschik
du geesd mit diia und miia in braata
waun i wos hob daun find is gschissn
wäu waun is hob daun duads ma wee

aun so an freidog aunfaung juni
ziaag i mei uua ned auf schoo iss nowemba
i ziiag mein schliidn iwa d schdrossn
a fest fia jeedn dea glicklich brend

i gee fon aana baung zua andan
da moogn draat se d sun wiad bees
i bin a miistkiwe foi unschuid
waun i was hob daun ka geduid

aun so an sundoog aunfaun juni
ziiag i mei uua ned auf schoo iss nowemba
i ziaag mein schliidn iwa d heisa
a fest fia jeedn dea goa nigs kend

aun so an sundog aufaung juni
ziiag i mei uua ned auf schoo iss nowemba

bliiatn und bliian

den gaunzn suuma
bisd duu en schodtn gleeng
und i hob mii daneem fagroom
mia haum heabsd

na sa gee ma wiida haam

aundas geed sis nima aus
aundas kaun i nigs mea seeng
aundas bliiad mei heaz
enzwaa

mei heaz bliiad
mia zwaa wooans
meine aung liiang
mia zwaa waans
gweesn waun i kennt

aundas wiad ned aundas sei
i hob no nii no iagandwos gseng
dabei bliiad mei heaz
na sa bliiad mei heaz enzwaa

es is a bliiatn und a bliian

braunschdaa

braunschdaa dengd need fü nooch
ea schiiabt liiawa woos fua
aus da mitn fon da wööd endkumd ma nua
mid guschn oda griag
aus da mitn fon da wööd endkumd ma nua
mid guschn oda siig

braunschdaa woar a zimmamau
und oes nua fia sein buam
braunschdaa woa se sööwa zweenech
aum noadboe schwimd de zeid dafoo
und kaana waas ned wiasoo
aum noadboe schwimd de zeid dafoo
und kaana waas ned warum

warum nua guschn oda griag

da beag

i schdee fuam himmebeag aus lauta baana
gauns oom ziidad wea i siich eam waana
mia foed nua ei i nim bendsiin und oes is fuabei

olas geed fuabei und olas hod a end
dawäu da beag fia ima brend

und daun nim i an zweag
aus de baana lesch eam oo
moch eam a bunschgrapffarlglasuua
schdöö eam zum höödnblods
daun is a rua

grantscheam

e ben a grantscheam
e ben a zwiidawuazn
e ben a schbaasfadeawa
e ben a uungustl fuan hean
owa e kau ned aundas
mia ged oes am oasch
des is mei goedans
heaz aus wean
es is olas zdeppad
es is olas wuaschd
es is olas aans
e wüü nigs hean
e ben a zwidawuazn
e ben a uungustl fuan hean
owa oole aundan
wo e hiischaun dua
de san aa ned gscheida
es is zum rrean
se dan waas god woos
dass ned grantig wean
und kaa roomfiich
kaun se schdean
wäu wauns grantig wean
kumd de bolezei
und dauand dan se
oes dadns wos hean
un daun lachns wida
un daan was god wos
un dann wolln sii mich bekeean
es is olas supa
es is olas schee
es is a riisngaude
doo en wean
huachds ma zua es bipm
woos hod eich d mama gsogd
nicht mit ungestln fakean

ii wüü

ii wüü das du mid mia reen duasd
aum schuihoof in nowemba
iwa obtreiwungan

ii wüü das du mia de haund hoezd
waun duu daun dei muada auruafsd
und dabei waansd

ii wüü ii wüü da soong
seit ich zeugungsfääch bin geeds mid mia
nua beagoo

ii dadads mia gean fageem
dass du doo bisd
wäu i kaun dii ned seeng

ii wüü i sog das gauns ealech
in heabsd deine aung und en winta
dein oasch

ii wüü nii mea wiida sibzen sei
wäu fon doo aun olas
nua meea obwoschbooa is

ii wüü das du mid mia reedsd
aum schuihoof im nowemba
iwa obtreibungan

keefa

faung da den scheenan keefa ei
biaschd eam fon da eeadn frei
zaag eam daun dei heisl und dei bood
bind eam de hagsarl mid schbagoood
schdöö eam no dei fogarl fua
und is eam koed so leeg eam hoed
an digkn teamofooa und aa
a schwaare degkn aufn bauch
so wiad eam woam ums heaz und wooi
und nii meea fressn wiad
fon deinen kool

leiamau

driüman hintan duaf doo schdeed a leiamau
und med schdeiffe finga draada wosa kau
boafuas aufm eis so schwaungda hin und hea
und sei glaanas döölall bleibd eam ima leea

kaana moog eam hean und kaana schaud eam au
und de hund de knuann schoo um den oedn mau
und ea losd as renan olas wias grood wüü
draad und aa sei leia schdeed eam nimma schdüü

waunsinicha oida
glaubsd das mas dazaan
wüüsd zu meine liiadln no dei leia draan

Text, Musik: Scheiner („leiamau“: Text nach Wilhelm Müller, Musik nach Franz Schubert)
Ausführende: Karl Ritter (Gitarre), Gerald Votava (Bass, Schlagzeug), Christine Ransmayr
(Cello), Georg Graf (Blasinstrumente), Petra Meisel (Stimme), Scheiner (Stimme, Gitarre)
Aufnahme, Mischung, Mastering: Gerald Votava
Coverfoto: MasterDomino
Grafische Gestaltung: Matthias Kobold
Kontakt: scheinermusik@gmx.at
www.scheinermusik.at

